



Zarafshon

Fidoyilik —
Vatanga xizmat demak!

2023-yil 13-aprel, payshanba,
44 (23.765)-son

KUN
HIKMATI

Maqsadsiz
yashaganlar
qarilikda
ham huzur
ko'rmaydilar

1913-yil aprel oyidan chiqa boshlagan



www.zarnews.uz https://www.facebook.com/zarnews.uz @zarnews_uz https://twitter.com/zarnews_uz

KONSTITUTSIYA — MENIKI, SENIKI, BIZNIKI!

MAS'ULLAR HISOBOTI DEPUTATLAR TAKLIPLARI BILAN TO'LDIRILDI

12-aprel kuni xalq deputatlari viloyat Kengashining sakson to'rtinchi sessiyasi bo'lib o'tdi.
Sessiya ishini Kengash kotibiyati mudiri Z. Karimov boshqardi.

Kun tartibiga ko'ra, dastlab viloyat ichki ishlar boshqarmasi boshlig'ining o'rinbosari — jamoat xavfsizligi xizmati boshlig'i X. Umarovning 2023-yil I chorak davomida viloyatda jamoat xavfsizligini ta'minlash borasidagi ishlar yuzasidan hisoboti eshitildi.

Ta'kidlanishicha, 2023-yilning o'tgan 1 choragi davomida viloyat hududidagi 1126 ta mahallaning 861 tasi jinoyat sodir etilmadi. Barcha sohalar bo'yicha qayd qilingan jinoyatlar soni 100 ming aholiga nisbatan viloyat bo'yicha 43 tani tashkil etib, respublikada ijroiyat jihatidan 5 o'rinda qayd etildi. Viloyat IIBning malakali rahbar va xodimlaridan iborat "Amaliy yordam ko'rsatish guruhi" tomonidan "qizil" toifadagi mahallalarda jinoyatchilikni jilovlash bo'yicha olib borilgan ishlar natijasida 44 mingga turli ko'rinishdagi huquqbuzarliklar aniqlanib, huquqbuzarliklarga nisbatan ma'muriy choralar ko'rildi.

Tazyiq va zo'rvonlikdan jabrlangan 397 nafar (2022-yilning shu davrida 700 nafar) ayollarga "himoya orderi" berilib, zo'rvonlik sodir etgan shaxslar ustidan nazorat o'rnatildi. Zo'rvonlikka uchragan xotin-qizlarning 2 nafarini voyaga yetmaganlar, 139 nafarini 18-30 yoshlilar tashkil etgan.

Voyaga yetmaganlar o'rtasida jinoyat va huquqbuzarlikning oldini olish maqsadida o'tkazilgan tadbirlar davomida 1292 ta holat aniqlanib, mas'ul shaxslar va ota-onalarga ma'muriy choralar ko'rildi.

Amalga oshirilgan ishlar natijasida o'tgan yilning shu davriga nisbatan qotilik jinoiyati 10 foizga, nomusga tegish 25 foizga, talonchilik 30 foizga, bosqinchilik 66 foizga, bezorilik 5,6 foizga, o'rtacha og'ir tan jarohati yetkazish 27 foizga, yengil tan jarohati yetkazish 5,2 foizga, avtoulovni olib qochish 67 foizga, o'lim bilan bog'liq yo'l-transport hodisalari 18,6 foizga kamaydi.

Shuningdek, xotin-qizlar tomonidan sodir etilgan jinoyatlar 110 tadan 75 taga, voyaga yetmaganlar jinoiyati 21 tadan 20 taga, muqaddam sudlanganlar tomonidan sodir etilgan jinoyatlar 141 tadan 61 taga kamayishiga erishildi.

Biroq viloyat hududida umumiy jinoyatlar 16 foizga (1530-1771), uncha og'ir bo'lmagan jinoyatlar 4 foizga (432-450), og'ir turdagi jinoyatlar 45 foizga (312-454) oshgan.

Bundan tashqari, o'g'irlik, firibgarlik jinoyatlarining ham ko'payishiga yo'l qo'yilgan.

Hisobot mas'ullar va deputatlar tomonidan atroflicha muhokama qilinib, jinoyatchilik va huquqbuzarliklarning oldini olishda har bir sektor hamda boshqa mutasaddi davlat organlari rahbarlarining shaxsiy mas'uliyatini oshirish, bu borada jamoatchilik imkoniyatlaridan keng foydalanish, joylarda kuzatuv kameralari o'rnatish yuzasidan taklif va tavsiyalar bildirildi.

Shundan so'ng **Majburiy ijro byurosi viloyat boshqarmaning 2022-yildagi faoliyati yuzasidan boshqarma boshlig'i S. Jabborov hisobot berdi.**

Hisobotda keltirilishicha, boshqarma va tuman, shahar bo'limalari tomonidan o'tgan yil 6,5 trilion so'mlik 541 ming 717 ta ijro hujjati yuzasidan amalga oshirilgan majburiy ijro tadbirlari natijasida 4,6 trilion so'mlik 368 ming 971 ta ijro hujjati yuzasidan yakuniy qarorlar qabul qilingan. Ular bo'yicha amalda 2,4 trilion so'mdan ortiq mablag' undirilgan.

2022-yil davomida ijtimoiy daftarlarga 45,7 milliard so'm mablag'lar o'tkazib berilgan.

Boshqarma boshlig'i tizimda ko'rilayotgan ijro hujjatlari soni ko'pligi, aliment undirish bilan bog'liq ijro ishlarida qarzdorliklar kattaligiga e'tibor qaratadi.

Jumladan, joriy yilning 1-yanvar holatida aliment to'lovlarini undirish bilan bog'liq ijro hujjatlari 35500 dan ortiqni tashkil qilgan. O'tgan yil aliment to'lovchi qarzdorlardan 141,7 milliard so'mdan ortiq aliment pullari undirib berilgan. Shu bilan birga, aliment to'lovlarini to'lashdan muntazam ravishda bo'yin tovlab kelgan 1100 nafar qarzdorlar ma'muriy, 139 nafari jinoiy javobgarlikka tortilgan.

Bugungi kunda boshqarma organlari ish yurituvidadagi aliment va moddiy ta'minot undirish bilan bog'liq ijro hujjatlari bo'yicha aliment to'lovchi qarzdorlarning 30 ming 833 nafari (86 foizi) ishsiz qarzdorlarni tashkil qiladi. Oqibatda 98 milliard so'mdan ortiq aliment pullarini undirish imkonini bo'lmayapti. Ushbu masala yuzasidan deputatlar o'z takliflarini bildirib, aliment to'lashdan bo'yin tovlab kelayotgan shaxslarga nisbatan choralarini kuchaytirish zarurligini ta'kidladi.

Sessiya kun tartibiga muvofiq, viloyat hokimligi bolalarini himoya qilish masalalari kotibiyati mudiri Sh. Quvatovning komissiyaning joriy yil birinchi chorakdagi faoliyati yuzasidan axboroti eshitildi.

Ma'lumotlarga ko'ra, 2023-yilning 1-yanvar holatida viloyatda 1 million 519 ming nafar bolalar (786 338 nafar o'g'il bolalar, 738 811 nafari qiz bolalar) mavjud.

Ularning 4088 nafari vasiylik va homiylikda, 78 nafari O'zbekiston "SOS bolalar mahallalari" uyushmasi Samarqand filialida, 51 nafari 9 ta oilaviy mehribonlik uyalarida, 46 nafari viloyat bolalar uyida, 41 nafari 28 ta patronat oilada tarbiyalanmoqda.

Bugungi kunda viloyatda 627 nafar bola "Mehr daftari" platformasiga kiritilib, ularga zarur yordam ko'rsatib kelinmoqda. Jumladan, 576 nafar bolaning orzu-istaklari o'rganilib, ularga 224 ta noutbuk, 42 ta planshet, 47 dona telefon, 22 jamlanma sport anjomlari, 52 tavelosiped, 96 ta mebel jihozlari, 73 ta tikuv mashinasi olib berildi. 2 nafar bolaning sog'lig'ini tiklash uchun 18 million so'm mablag' yo'naltirildi.

O'tgan yil viloyatdagi yetim va ota-ona qaramog'idan mahrum bo'lgan 36 nafar bola uy-joy bilan ta'minlandi. Bu yil esa 48 nafar bolani uy-joy bilan ta'minlash ko'zda tutilgan.

Joriy yilning birinchi uch oyiligi mobaynida viloyatda 98 nafar bola ota-onalarining notarial roziligi va sudning qaroriga asosan qarindoshlariga, 5 nafar yetim va ota-ona qaramog'idan mahrum bo'lgan bola esa farzand asrab olish istagida bo'lgan oilalarga farzandlikka berilgan.

Bundan tashqari, ishlash uchun chet davlatga ketgan ota-onalarning 580 nafar farzandlari hamda 51 nafar ota-ona qaramog'idan mahrum bo'lgan bolalarga vasiylik va homiylik tayinlangan.

Sh. Quvatov bolalar manfaatlarini himoya qilish yuzasidan bir qator takliflarni bildirdi va bu takliflar deputatlar tomonidan qo'llab-quvvatlandi.

Sessiyada viloyat hokimi o'rinbosarlarining 2023-yil I chorak faoliyati samaradorligi natijalari hamda 2023-yil II, III va IV choraklar uchun faoliyati samaradorligini baholashning asosiy mezonlarini tasdiqlash to'g'risidagi, viloyat mahalliy budjetining qo'shimcha manbalaridan foydalanish to'g'risidagi, jamoat ehtiyojlari uchun yer uchastkasini olib qo'yish bo'yicha taqdimot materiallarini ko'rib chiqish va mulkdorlar bilan ochiq muhokama o'tkazishga ruxsat berish to'g'risidagi, kichik va yoshlar sanoat zonasini hududlarini o'zgartirish to'g'risidagi masalalar ham ko'rib chiqildi.

Muhokama etilgan masalalar yuzasidan Kengashning qarorlari qabul qilindi.

Kun surati



Aholi bilan uchrashish, ularni eshitish uchun joy va vaqtning ahamiyati yo'q.

Viloyat hokimi Erkinjon Turdimov kecha Nurobod tumanining olis qishloqlarida bo'lib, aholi bilan yuzma-yuz muloqot qildi.

Ittifoq, Hazarmali, Chorvador, Olg'a mahallalarida o'tkazilgan uchrashuvlarda hudud aholisini qiyinlab kelayotgan masalalar muhokama etilib, ularni qisqa fursatlarda hal etish yuzasidan zarur chora-tadbirlar belgilandi.

— Uzoq qishloqlarda, boshqa joylardagidan murakkab sharoitda yashayotgan yurtdoshlarimiz ham e'tibordan chetda qolishi kerak emas. Yurtimizdagi o'zgarishlar, yangilanish jarayonlarini, inson qadri uchun tamoyili asosida olib borilayotgan islohotlarni ular ham o'z hayoti, turmushida his qilishi kerak. Bu joylardagi muammolar kabinetlarda emas, shu joyning o'zida hal etilishi lozim, — dedi E. Turdimov.



KOMISSIYA FAOLIYATI HAQIDA AXBOROT BERILDI

Markaziy saylov komissiyasining kecha o'tkazilgan navbatdagi majlisida O'zbekiston Respublikasi referendumini o'tkazuvchi 7-Samarqand okrug komissiyasi tomonidan amalga oshirilayotgan ishlar yuzasidan komissiya raisi F. Toshevning axboroti eshitildi.

Axborotda ayni paytda okrug hududida 1111 ta referendum o'tkazuvchi uchastka tuzilib, komissiyalar tarkibi tasdiqlangani, barcha tuman va shaharlarda uchastka komissiyalari a'zolari uchun seminar-treninglar o'tkazilgani haqida ma'lumot berildi.

Referendum o'tkazuvchi uchastka komissiyalarining Saylov jarayonini boshqarish axborot tizimi (SJBAT) orqali saylovchilarning yagona elektron ro'yxatiga ulana olishini ta'minlash maqsadida uchastkalarda SJBAT talablariga javob beradigan kamida ikkita kompyuter o'rnatilgani va ular yuqori tezlikdagi internetga ulangani ta'kidlandi.

Shuningdek, okrug va uchastka komissiyalarining bugungi kundagi faoliyati to'g'risida ham ma'lumot berildi.

Majlisdan so'ng ommaviy axborot vositalari vakillari ishtirokida brifing o'tkazildi.

7-Samarqand okrug komissiyasi matbuot markazi.

AMALDAGI KONSTITUTSIYADA IX bob. Iqtisodiy va ijtimoiy huquqlar

37-modda.

Har bir shaxs mehnat qilish, erkin kasb tanlash, adolatli mehnat sharoitlarida ishlash va qonunda ko'rsatilgan tartibda ishsizlikdan himoyalash huquqiga egadir.

Sud hukmi bilan tayinlangan jazoni o'tash tartibidan yoki qonunda ko'rsatilgan boshqa hollardan tashqari majburiy mehnat taqiqlanadi.

O'ZBEKISTON RESPUBLIKASI
REFERENDUMI
2023

42-modda.

Har kim munosib mehnat qilish, kasb va faoliyat turini erkin tanlash, xavfsizlik va gigiyena talablariga javob beradigan qulay mehnat sharoitlarida ishlash, mehnati uchun hech qanday kamsitishlarsiz hamda mehnatga haq to'lashning belgilangan eng kam miqdoridan kam bo'lmagan tarzda adolatli haq olish, shuningdek ishsizlikdan qonunda belgilangan tartibda himoyalash huquqiga ega.

Mehnatga haq to'lashning eng kam miqdori insonning munosib turmush darajasini ta'minlash zarurati hisobga olingan holda belgilanadi.

Homiladorligi yoki bolasi borligi sababli ayollarni ishga qabul qilishni rad etish, ishdan bo'shatish va ularning ish haqini kamaytirish taqiqlanadi.

43-modda.

Davlat fuqarolarning bandligini ta'minlash, ularni ishsizlikdan himoya qilish, shuningdek, kambag'allikni qisqartirish choralarini ko'radi. Davlat fuqarolarning kasbiy tayyorgarligini va qayta tayyorlanishini tashkil etadi hamda rag'batlantiradi.

44-modda.

Sud qarori bilan tayinlangan jazoni ijro etish tartibidan yoxud qonunda nazarda tutilgan boshqa hollardan tashqari majburiy mehnat taqiqlanadi.

Bolalar mehnatining bolaning sog'lig'iga, xavfsizligiga, axloqiga, aqliy va jismoniy rivojlanishiga xavf soluvchi, shu jumladan, uning ta'lim olishiga to'sqinlik qiluvchi har qanday shakllari taqiqlanadi.

KONSTITUTSIYAVIY QONUN LOYIHASIDA IX bob. Iqtisodiy, ijtimoiy, madaniy va ekologik huquqlar

